

Xcarta San Pablo huantu tzoknikolh Efesios

XATAPAJMUJUN TACHIUIIN:

Yumá xcarta apóstol Pablo tzoknikolh xtacanjalanin huanti xuilakó c-xacachiqin Éfeso. Antá unú litakalhchihuinankoy pi xaliñkalin macxtum calakolh, usu calitamactumikolh Cristo. Xlá limalacapastacnikoy pi: “Caj xman chatum huí Quimpuchinacán, aktuma tacanjla huantu kalhiyahu, chu caj xman pulactum lakapasahu takmunin. Chuná lantla Dios huanti lipahuanahu xlicana pi caj xman huá xacstu Quintlaticán, huanti mapaksikoy xlipacs huantu anán. Xlá tlahuay xtascújut c-quilatamatcán, chu ankalhin talamakó caxaticahua chixcú.”

Yamá tamactumit huantu stalanca xlitasiyut c-xlatamatcan yamá huanti lipahuankoy Cristo, Pablo limaxtukoy xtachuná lantla xmacni chatum chixcú, huampi huá Cristo xaxxeká yumá macni (1:22-23). Yumá canajalanin na tamalacastuckocán xtachuná lantla aktum tlanca talhmana chiqui antani Cristo litaxtuy xtachuná lantla xapuxcu talayahu huantu lijaxkonit yumá chiqui (2:20-22), chu xlipulactutu huantu limalacastuckocán xtachuná lantla chatum lilakatit xtasquin Cristo huanti natatapuchuhuay (5:25-32).

Xlipacs huanti limalacastuckocán xcanajalanin lacatancs huamputún pi Cristo huá Quimpuchinacán xlipacs quin huanti lipahuanahu, chu quincalimaxtuyán xatasiculanalan c-siculan. Xlá cuñtaj tlahuay, chu maktakalha c-siculan; huampi ni caj xman maktakalhkooy huanti lipahuankoy huampi na paxquikoy.

Pablo huanikoy skalhén xtacanjalanin xala c-Efeso

1 Quit Pablo huanti Dios quilacsacnit laquimpi naclitaxtuy xapóstol usu xtamalakachan Jesucristo, lipaxuhu ccatzoknimán yumá quincarta xlipacs huixin huanti tapaksiniyátit Dios, chu akstitum takokayátit Quimpuchinacán Jesucristo c-xacachiqin Efeso.

²Clacasquin pi Quintlatican Dios, xahua Quimpuchinacan Jesucristo cacalakalhamán, chu cacamaxquin huantu tlan latamat.

Calipaxcatcatzinihu Dios xtalakalhamán

³Caxanilihuayá camaxquihu paxcatcatzinit Dios huanti tlat Quimpuchinacan Jesucristo, sampi caj lantla lipahuanitahu Jesús, Dios quincaucxilhlacachinitán c-akapún, chu lhuhua huantu quincalisculanatlahuanitán c-quilistacacán, chu lantla acxtum tahuanitahu Cristo. ⁴Hasta lantla Dios ni xamalacatzuquiy caquilhtamacú, xlá aya xquincalacsacnitán

pí naquincamaakaputaxtiyán
 chü naquincalimāxtuyán
 xtachuná la tī nīalh tú laclenahu
 c-xlatatīn Dios laquimpī chū xman
 huá Quimpuchinacan Jesucristo
 natapaksiniyahu. Xlā chuná
 tláhualh caj xpalacata cumu
 quincalalakhamanán, ⁵xlacasquín
 pí quin luhua huá xlakskatán
 nalitaxtuyahu caj lantla huá
 nalipahuanahu Jesucristo, sampi
 luhua chuná xpuhuanit natlahuay
 xtalacasquín. ⁶Huá xpalacata,
 quin ankalhín limastayahu
 paxcatcatzínit huá lantla mininiy
 yama tlanca xtalakalhamán huantu
 xquincakalhiniyán acxni macámilh
 xCam Jesucristo huanti luhua paxquiy,
 laquimpī naquincalakmāxtuyán.
⁷Na caj huá xpalacata tama tlanca
 xtalakalhamán, Dios quincalacxapanín
 xlipacs quintalakalhincán caj xpalacata
 xkalhni huantu stjamakanit xCam
 acxni quincapalacanín, chü chuná tlan
 quincamatzankananín laquimpī nīalh
 naxokonahu. ⁸Xlicana pí luhua
 tlanca tapáxquít tú quincakalhiniyán
 lantla quincamaxquiyán tastácat
 chü takataksni ⁹laquimpī tlan
 naakataksahu huantu nī pala chatum
 lihuana xakataksnit xpalacata lantla xlā
 xlihcāhuiliniit naquincalakmāxtuniyán
 quilistacnacán. ¹⁰Chü na catziyahu
 pí acxni nalakchán quilhtamacú
 chü pacs kantaxtukonit nahuán
 huantu xlā līlhcahuiliniit, acxni yama
 quilhtamacú pacs namacamaxquicán
 Cristo huantu anán xlicatlanca akapún,
 chü catuxáhuat, laquimpī xman huá
 natzucuy mapaksikoy.

¹¹Hasta lantla xamakan quilhtamacú
 Dios aya xquincalacsacniitaná
 quin judíos, laquimpī caj cumu
 acxtum natahuanahu Cristo
 chuná tlan namakamaklhtinanahu
 huantu xlā chuná līlhcahuiliniit
 pí naquincataquiyán, sampi xlā

ankalhín tlahuay huantu chuná
 lakatiy. ¹²Huá xpalacata, quin judíos
 huanti xakasiya lipahuanitahu
 Cristo, luhua quincamininiyán
 ankalhín napaxcatcatziniyahu Dios
 caj xpalacata tlanca xtalakalhamán.
¹³Huampi na chuná huixín huanti nī
 judíos, acxni huacu kaxpáttit yuma
 tachihuín huantu xtaluloktat Dios,
 chü huantu huixín camaxquiyán
 laktáxtut, chü lipahuántit Cristo, pus
 Dios acxtum tatlahuanit milatamatcán,
 chü xlatamat xCam Jesús, chü
 quincamaxquín Espíritu Santo
 huanti xuanittá naquincamaxquiyán
 laquimpī chuná lacatancs nacatziyátit
 pí chü xman huá tapaksiniyátit
 Dios. ¹⁴Chü yama Espíritu Santo
 na huá quincalimāxquiniitán Dios
 laquimpī nī atuyá napuhuanahu,
 huata tancs nacatziyahu pí fuerza
 pacs naquincamaxquiyán huantu
 naaktumkalhiyachahu xatakatzín. Acxni
 yama quilhtamacú cumu xatakatzíná
 nakalhiyahu quilaktaxtutcán, tlan
 macxtum namaxquiyahu paxcatcatzínit,
 chü cacni caxanilihuayaj xtihua.

**Pablo ankalhín squiniy lītlan
 Dios pí xalihuacá camaxquikolh
 tastácat, chü takataksni**

¹⁵Cumu ccatziy lantla akstítum
 lipahuanátit Quimpuchinacan
 Jesús, chü lakalhamankoyátit
 xlipacs minatalanincán huanti na
 tapaksinikoy Dios xtachuná lantla
 huixín, ¹⁶quit ankalhín acxni ctlahuay
 quioración camaxquiy paxcatcatzínit
 Dios mimpalacatacán. ¹⁷Acxni
 chuná ctlahuay oración c-xlatatīn
 Dios huanti xtlat Quimpuchinacan
 Jesucristo, quit csquiniy lītlan
 yama talipahu Quintlaticán huanti
 huilchá c-akapún pí cacamaxquín
 tastácat, chü takataksni laquimpī
 tlan naakataksátit xtalacapastacni,
 chü tlak tlan nacalimalacahuaniyán

lantla tlan catziy. ¹⁸Quit cuaniy Dios pi cacamaxquín xkakánat c-mintalacapastacnicán laquimpí naucxilhlacachipinátit tū namaklhtinanapítit alístalh; chū lantla luhua xcatzít līlakátit, chū līcacni huantu Dios namaxquikoy, usu nataquikoy xlipacs huanti lacsackonit nalakalhamankoy, ¹⁹chū lantla nī kalhiy xtamácat, xahuā xliakasputni yama tlanca xlitlihuaka Dios, huatiyá yama xlitlihuaka huantu scujma c-quilatamatecán quin huanti lipahuanahu. Huatiya yuma tlanca litlihuaka huantu timasiyulhá c-xlatamat Jesucristo, ²⁰acxni timalakastakuánihl calínin, chū nā antá c-xpakstácat tihuīlīlh c-akapún antani kalhima tlanca līcacni. ²¹Antá huilīnit laquimpí namapaksikoy pacs huantu anán masqui caxatūcahua litlihuaka, usu limapaksin huantu anankoyá c-akapún, usu huantu acu nalacatzucuy. ²²Catūhua tū anán, pacs huá namacamaxquiy Cristo laquimpí huá namalanankoy, chū nā huá chuná lacásquilh pi napuxculenkoy xlipacs canajlanin huanti xlá lacsackonit nalakmaxtukoy xlistacnacán. ²³Sampi xlipacs huanti lipahuanankoy Cristo litaxtukoy xtachuná lantla xmacni chatuma chixcú, chū Cristo huá litaxtuy xaxxekacán huanti namaxquikoy latámat, chū xlitlihuaka, sampi caj xpalacata pi huá maxquiy litlihuaka, chū latámat hua makcatzi lianán xlipacs huantu anán.

Caj xpalacata pi Dios quincalakalhamanítan masqui chú aya kalhiy laktáxtut quilistacnacán

2 Xapulana huixin xtachuná lantla xanin xlapátit c-xlacatin Dios caj xpalacata yama mintamacapatanún, chū catūhua lixcajnit talakalhin huantu xliapátit, ²sampi hua umincha quilhtamacú pacs huá xmaktlahuapátit

xtalishmanincán huantu tlahuakoy huanti unú tapaksikoy catuxáhuat, chū huá xkalhakaxpatátit yama lixcajnit xtalacapastacni akskahuiní, yama nitlan xatlajananin spíritu huanti mapaksinán caunín, chū caj tzeke mapuhuanikoy tachixcuhuítat pi caj chunata cakahakaxmatmakankolh Dios. ³Huampi umincha quilhtamacú acxni xlipacs quin nā chuná xlamahu, caj xman huá xmakantaxtimahu huantu xlimapaxuhahu quimacnicán, xlipacs yuma huantu chuná tlahuamahu xquincamininiyan pi naquincamapatinicanán xtachuná lantla amakapitzin. ⁴Huampi caj xpalacata lantla Dios tlan catziy, nī quincamapatinín, huata caj lihuacá quincalakalhamán, ⁵chū masqui xtachuná lantla xanin xclamahu c-xlacatin caj xpalacata quintalakalhinacán, milh quilhtamacú acxni xtachuná quincamalakastakuanin calínin, chū quincamaxquín xasasti quilatamatecán xtachuná lantla tikálhīlh xasasti latámat Cristo acxni tilakastakuánihl calínin. Natalanin, niucxni capatzankátit pi caj xpalacata pi Dios caj litlan quincalakalhamanítan masqui chú aya kalhiyahu akaputáxtut. ⁶Chú pi quilatamatecán acxtum tahuanit xlatamat Cristo Jesús, huamputún pi acxni Dios malakastakuánihl calínin xtachuná quitaxtuy pi nā lacxtum quincatamalakastakuanin laquimpí chú acxni nalakchán quilhtamacú naquincahuiliyan c-xpaxtún c-akapún antani natamapaksinanahu. ⁷Hua chuná litláhualh laquimpí caxanilihuayaj quilhtamacú nacatzicán lantla xlá caj lipaxcatcatzínit kayaj quincalakatzán, chū nī quincamapatinín quin huanti aya lipahuanahu Cristo Jesús. ⁸Pus caj xpalacata xtalakalhaman Dios huixin kalhiyátit akaputáxtut pi canajlayátit huantu malacnuy, nī huá likalhiyátit laktáxtut xpalacata pala

tú tlan xtlahuátit, huāmpi huá Dios caj litlān camaxquinitán. ⁹Ni pala chatum tí napuhuanachá pala hua līlakalhámalh Dios caj xpalacata pala luhua tlan catziy, xlicānā pī nī huá calīlakalhamancántit cumu pala tlahuátit tlan tatlahu. ¹⁰Sāmpi hua lantla akaputaxtunītahu, pacs huá Dios tlahuanit, xman huá catziy lantla quincatlakuanitán lantla tzúculh scuja c-quilatamatcán acxni lipahuahu Cristo, laquimpi alīstalh huá nalīlatamayahu huantū akstītum, chū xman hua lacuan tatlahu natlahuayahu, xtachuná lantla xlá xlihlchahuilīnit xamakan quilhtamacū.

**Macxtum talanītahu Cristo
pacs quin tī lipahuanahu**

¹¹Pus huá xpalacata, huixín huantī nī judíos, nī tipatzankayātīt lantla xapulānā huixín xaaktzankān xlapātīt, chū lantla tamā judíos nītū xcaucxilhputunān, sāmpi huixín nītū circuncidar lanītāntīt xtachuná lantla xlacān tlahuakoy c-xmacnicān laquimpi nacatzicān pī huá lipahuankoy Dios. ¹²Calacapastāctīt lantla ūmincha quilhtamacū huixín nī xkalhkalhīpātīt namín chatum mimaakaputaxtīnacān Cristo xtachuná lantla xkalhkalhīmakō judíos, sāmpi nī antā xmaktapaksiyātīt yamā huantī līmapacuhīkoy israelītas huantī Dios xlcasackonīt laquimpi xcamān nahuankoy, nā nī pala tzinū xcatziyātīt huantū Dios makān xtātlahuakonīt xatatzokni xtalaccaxlān, xahuā huantū xmalacnūnikonīt namaxquīkoy xlipacs tī nalīpahuankoy. Xlipacs huixín akpuntum xlapātīt, nītī xlipahuanātīt Dios, chū nītū xucxilhlacachīpātīt, usu xkalhkalhīhuilātīt huantū Dios nacamaxquiyachān alīstalh c-akapūn. ¹³Huāmpi huá chū huixín lantla acxtum talanīt milatamatcān xlatamat Cristo Jesús caj xpalacata

xkalhni huantū xlá stjalmákalh c-cruz, acxni capalacanīn, huixín, huantī xapulh nī lay xtamalacatzuhuiyātīt Dios, huá chū luhua mān camalacatzuhuinītán. ¹⁴Xlicānā pī Cristo tī quimatancsanacán huantī huilīnit tapaxuhuān c-xlakstipancan huantī judíos, chū huantī nī judíos laquimpi kampaumā nalītaxtuyahu, chū lacxtum naquincamalacatzuhuiyān Dios. Xlā acxni lītamāstalh namaknicān c-cruz, chunā malakspūtulh, usu līmapānūlh yama tasītzīn huantū xtachunā pātzaps quincastokopitzīyān, chū chunā nī xlaucxilhputunahu. ¹⁵Xlicānā pī Cristo acxni nīlh quimpalacatacān, chunā līactlahuakolh tū xtlahuama yamā xlīmapaksīncan judíos lantla xquincamapapitzīyān, laquimpi quin huantī caj xpalacata yamā līmapaksīn nī xlalīucxilhputunahu; acxni quin acxtum lā judíos chū nī judíos lipahuahu pulactumā quincalīmaxtunītán, chū chunā malakspūtulh tasītzīn. ¹⁶Caj xpalacata cumu Cristo nīlh c-cruz, chunā līmalakspūtulh yamā tasītzīn huantū xapulh xlakalhinīkoy judíos, chū huantī nī judíos, huata malacatzuhīkolh c-xlacatīn Dios laquimpi luhua caj xman pulactumā xcanajlanīn Cristo nahuanahu.

¹⁷Acxni Cristo milh catuxāhuat, xlā liakchihiuīnalh aktum xasasti xtamacatzīnīn huantū malakspūtulh tasītzīn laquimpi tlan nalalīpahuanahu, chū nalatalenahu, chū laquimpi xlipacs quinacucān nalīpahuanahu Cristo, chū nī anān tapecuā lakxtum natalacatzuhūniyahu Dios laquimpi acxtum naquincamatzankānaniyān, chunā lantla huixín huantī nī judíos makāt xlapānītīt Dios, nā chunā lantla quin huantī judíos, chū lacatzū lamānihu sāmpi lakapasahu xatī xlā.

¹⁸Sāmpi caj xpalacata Cristo lantla quin

huanti judíos, chu lantla quin huanti
 ni judíos, nialh ti atuyá napuhanahu,
 acxtum laktalacatzuhuiyahuh
 Quintlatican Dios, sampi caj xpalacata
 yama huatiya aktum cspiritu Dios
 huantu quincamaxquinitán macxtum
 lihuanihahu. ¹⁹Huá xpalacata
 ccalihuaniyán pi huá chú huixín
 huanti ni judíos nialh litaxtuyátit
 xtachuná lantla ti mákat xalanín,
 huampi na huá acxtum tatapaksikoyátit
 yama putum canajlanín huanti
 Dios lacsackonit laquimpi xcamán
 nalitaxtukoy, pus na calakchanán
 huantu xlacán namaxquikocán.
²⁰Xlipacs huixín huanti lipahuanátit
 Jesús xtachuná litaxtuyátit lantla
 xapátzaps aktum tlanca chiqui huantu
 timalacatzuquikochá apóstoles, xahua
 profetas, chu Jesucristo huá litaxtuy
 xtachuná lantla yama tlanca chíhuix
 huantu puxcuhui c-xchastun yama
 xapatzaps chiqui. ²¹Cumu pacs yuma
 chíhuix lantla acxtum tahuanlihakoy
 Cristo huanti xapuxcu chíhuix, chú
 yama pátzaps lalihuán natzucuy
 caxlakoy hasta acxni nalitaxtuy
 xtachuná aktum lilakatit templo antani
 Dios lakatiy namaxquicán ccani. ²²Pus
 na chuná chú pacs huixín nalitaxtuyátit
 huanti nalipahuanátit Cristo, cumu
 pacs macxtum lamatlihuaklhátit, pus
 litaxtuyátit xtachuná lantla xputáhuilh,
 usu xtemplo Dios antani xlá lakatiy
 natahuilay sampi antá lama Espíritu
 Santo c-milatamatcán.

Dios xliilacsacnit Pablo naakchihuinanikoy ti ni judíos

3 Caj huá xpalacata, quit Pablo,
 clitachinít, cpatinamā c-pulachin
 caj xpalacata cliscujma Cristo Jesús,
 chu ccaliakchihuinanín xtachihuín
 xlipacs huixín huanti ni judíos. ²Sampi
 cpuhuán pi xamaktum max aya
 catziyátit lantla Dios caj xtalakalhamán
 quiliilacsacnit pi nacmakantaxtiy

huantu xlá quilimascujuma pi
 naccaliakchihuinanianiyán xtachihuín.
³Dios man quimacatzínih huantu
 nití xacatziy lantla xlá lilhcāhuilínit
 nalakmaxtukoy milistacnacán,
 huachá tu ccahuanimán yuma
 c-cartā masqui caj tzinú. ⁴Acxni
 huixín nalikalhtahuakayátit tuncán
 naakataksátit, chu nacatziyátit pi
 xlicāna Dios quimalakapasnínit huantu
 caj tzek talulótkat lantla xlihcāhuilínit
 namakantaxtiy Cristo mimpalacatacán.
⁵Huā yuma xtalacapastacni huantu
 hasta lantla xamākan quilhtamacú
 tzek xuilínit, chu ni pala chātum
 ti xlakapasa, huampi huā lantla
 chú Dios macatzínikonit huanti xlá
 lacsackonit yuma xtalakachānín
 apóstoles, xahua xquilhachihuinanín
 profetas calimacatzínih Espíritu
 Santo. ⁶Yama huantu xlihcāhuilínit
 Dios, chu huantu tzek xuilínit, huā
 yumá: pi caj xpalacata nalipahuanátit
 Jesús huanti mastay laktáxtut, xlipacs
 huixín xaakmakat chixcuhuin huanti
 ni judíos na namakhtinānátit yama
 huantu Dios makān quilhtamacú
 malacnunikonit namaxquikoy
 judíos. Sampi Dios na calimacānān
 pi acxtum nacatāmapaksiyān, chu
 natāmakhtinankoyátit judíos huantu
 makān quilhtamacú xmalacnunikonit
 pi namaxquikoy caj xpalacata
 nalipahuanátit Cristo Jesús.

⁷Masqui xlicāna pi ni pala tzinú
 quimininiy, Dios chuná quiliilacsacnit
 pi naclakatayay yuma tascújut
 nacliakchihuinan yama laktáxtut
 huantu mastay Jesús, chu huā
 quimāxquiy litlihuakā laquimpi tlan
 nacmakantaxtiy. ⁸Sampi xlicāna pi
 quit atzinú nitú quilakasi ni xahua
 litum yamá huanti talipahu lantla ti xlá
 lacsackonit, huampi masqui chuná, xlá
 quiucxilhlacachinít, chu tlan tlahuanit
 pi quit nacliakchihuinanikoy yamá
 huanti ni judíos yama tlan latámat,

chü tlanca tapaxuhuan huantu Cristo namaxquiy hua lapi nalipahuankey,
⁹chü yama talipahu Quintlatican Dios huanti malacatzuquinñit xlipacs lantla tu anán quilimapaksinñit pi quit lihuana nacmaakataksnikoy xlipacs tachixcuhuítat huantu hasta lantla xamakan quilhtamacú tzeq xuilinñit lantla quincalakmaxtuputunán.

¹⁰Xlipacs yumá chuná tlahuama laquimpi yama tlihuaka mapaksinanñin ángeles huanti masqui ni tasiyukoy malanankey c-xlicatlanca caunñin, chü akapún, naucxilhkoy lantla Dios lacxtum quincatlakuanñitñ caji xpälacata cumu lipahuanñitahu Jesús, chü chuná xlacán tlan nalilacahuanankoy c-quilatamatcán pi xlicana tlanca xlacatzúcut kalhiy xtastacat Dios. ¹¹Hasta lantla xamakan quilhtamacú Dios chuná xlaclhcahuilñit pi chuná judíos cumu lantla huanti ni judíos acxtum naquincalakmaxtuyán, chü hasta huacu lihuana makantáxtilh Jesucristo. ¹²Chü caji xpälacata cumu lipahuanahu Cristo tlan lipaxuhu laktalacatzuhuiyahu Dios, chü nialh pecuaniyahu sampi catziyahu pi hua Cristo quincapalacatayayan. ¹³Pus hua xpälacata ccalihuanianñi pi ni clacasquín nalitaxlajuaniyátit caji lantla tu quit clipatima caji mimpalacatacán, huata chuná tlan litahuixcaniyátit sampi stalanca ccamasiyunimán lantla ccalakalhamanán.

Cristo lipecua quincapaxquiyán

¹⁴Hua yumá xpälacata quit clilakatazokostay Dios xtlat Quimpuchinacan Jesucristo, ¹⁵huanti malacatzuquikonñit xlipacs huantu anán c-akapún xahua catuxáhuat. ¹⁶Quit csquiniy litlán, chü climaakatzankay pi lantla minñi tlanca xtalakalhamán cacamaxquín xlitlihuaka Espíritu Santo c-mintapuhuanacán, chü c-milatamatcán huantu tlan nalitahuixcaniyátit.

¹⁷Na csquiniy litlán Dios pi Cristo catahui, chü hua camalánalh c-minacucán laquimpi ankalhiná akstítum nalipahuanátit, chü na chunatiyá nalapaxquiyátit xtachuná lantla xlá capaxquiyán, ¹⁸laquimpi huixín, chü na xlipacs amakapitzín huanti aya lipahuankey Cristo naakataksátit lantla xlá xlititlanca, xlihlmán, xlipulhmán, chü xlitahmán lantla quincakalhinianñi tapáxquit Cristo huantu quincamacamininñit. ¹⁹Csquiniy litlán Dios pi lihuana cacamalakapasnñin yuma xtapáxquit huantu ni lay lihuana catziyahu lantla luhua xlitlanca, laquimpi acxni aya lihuana lakapasátit nahuán, na chuná nakalhiyátit talacapastacni chuná lantla Dios kalhiy xatlan xtalacapastacni.

²⁰Caná cpaxcatcatzinñi talipahu quiDioscán huanti kalhiy tlanca litlihuaka xpälacata tlan natlahuakoy hasta huantu quin ni catziyahu squiniyahu, chü ni pala tzinú catziyahu pala tlan tatlahuay, huampi xlá chuná quincamaktayayan xlitlihuaka. ²¹Xlimakua lamakoj nahuán tachixcuhuítat catuxáhuat, chü hasta caxanilihuayaj xtihua calipaxcatcatzinñikolh Dios caji xpälacata huantu tlahuanñi c-xlatamat Jesucristo, chü c-quilatamatcán xlipacs quin huanti aya lipahuanahu. Chuná calalh, amén.

Espíritu Santo macxtum quincatlahuayan

4 Pus cumu quit cpatima c-pulachin caji xpälacata clitayay pi clipahuan Quimpuchinacan Jesús, ccasquiniyán litlán pi huantu akstítum calatapátit xtachuná lantla xlitlatamatcán huanti luhua man lacsackonñi Dios, chü tasanikonñi nalipahuankey. ²Acxtum calalakalhamántit, nití calacataquítit huata tlan calacatzinñit, acxtum calamaktayalipítit lapi xlicana lapaxquiyátit. ³Caná huixín,

ankalhín calilakaputzátit pī chunatiyá macxtum nalayátit xtachuná lantla camamacxtumínitán Espíritu Santo laquimpi chuná ankalhín lipaxuhu nalilatapayátit. ⁴Xlipacs quin huanti lipahuanahu Cristo litaxtuyahu xtachuná lantla chatumá, sampi mana huatiyá chatum Espíritu Santo huanti quincamaktayamán, chu acxni Dios quincátsanín nalipahuanahu, huatiya pulactum tapaxuhuan huantu quincamalcuninítan acxtum nauxixlhlacachānahu. ⁵Sampi caj xman chatum huí Quimpuchinacán, chu mana huatiya aktum tacānjla huantu kalhiyahu, chu caj xman pulactum lakapasahu takmunún. ⁶Yama Dios huanti lipahuanahu, caj xmana huatiya chatum anán, huanti Xtaticán xlipacs tachixcuhúitat, chu caj xman huá xacstu mālananikoy pacs lantla tu anán, na huanti tlahuama xtascújut c-xlatamatcán xlipacs catihuá, chu ankalhín talamakó masqui catihuá.

Dios chatunu quincamaxquiyán quintascujtán

⁷Masqui quinchalhuuacán tī lipahuanahu, lantla chatunu quin quincamaxquicanítan xlixla quintastacatcán, usu quintascujtán huantu Cristo lacasquín namakantaxtiyahu. ⁸Huachá xpalacata c-Likalhtahuakā chuná tatzoknīt huan:

“Acxni xlá talacáxtulh c-akapún lenkolh xlipacs huanti xmakatlajakonīt, chu xtachuná lantla xtachín xlikalhikoy, na maxquikolh xlixla xtascujtán tachixcuhúitat.”

⁹Xamaktum huí tī napuhuan: “¿Tū cahuá huaniputún acxni huan pī talacáxtulh c-akapún?” Tamá huaniputún talacáxtulh c-akapún sampi na xalipulanā tactachi unú catuxáhuat. ¹⁰Chu tamá huanti tactachi catuxáhuat, na huatiyá litum yamá

huanti talacáxtupá c-akapún laquimpi canihuá namasiyuy xlitlihuaka catiyatna xahua c-akapún. ¹¹Pī huatiyá yuma Cristo maxquikolh xtascujtán lantla chatunu chatunu tī canajlanikoy. Makapitzín limaxtukolh xapóstoles huanti macuintajlikolh xtachihuín laquimpi tancs naankoy lichihuínankoy, makapitzín limaxtukolh profetas huanti maxquikolh litlihuaka namacatzinínankoy xtalacapastacni Dios, chu tu natlahuay; makapitzín maxquikolh tastácat lantla tlan naliakchihuínankoy xtachihuín laquimpi tlan nalakmaxtukoy xlistacnacán huanti nakaxmatkoy, chu makapitzín na limaxtukolh pastores huanti napuxculenkokoy tī lipahuanokoy Cristo, xahua makalhtahuakananín huanti nalikalhchihuínán xtachihuín Dios. ¹²Chuná laccaxuilikolh huanti xlá xlcasackonīt laquimpi akstítum nalaliscujkoy, chu nalamaktayakoy c-xtacanajlacán, chu laquimpi lihuacá natalhuuikoy huanti lipahuanokoy Cristo. ¹³Hasta nilihuayá macxtum nalilayahu quintacanajlacán lantla lihuana nalakapasahu Jesús huanti xCam Dios. Acxni chuná lamahu nahuán lantla quincamininiyán nalatamayahu, stalanca natasiyuy pī akataksnītahū nahuán lantla luhua lacatancs quililatamatcán quin huanti lipahuanahu Cristo.

¹⁴Acxni chuná naquinaquixtaxtuniyán, nialh xtachuná catilitaxtuhu xtachuná lantla lactzu lakskatán huanti pala ucu tanu huantu lacapastackonīt natlahuakoy, caj lipuntzú aya tanu huantu tlahuaputumpalakoy, chu lacapala liakskahuimikocán atanuj xasasti tastacyahu huantu liakchihuínampulakoy tama chixcuhuín huanti masqui acstacā chihuínankoy na xaaktzankán lamakó. ¹⁵Chí huampi luhua akstítum cakalhchihuínahu,

chü huantü tlan calapaxquiñu, lihuana calakapasui huantü xtalacapistacni Cristo, sampi hua tama quiaxkekacán, chü quin litaxtuyahu xmacni. ¹⁶Chü pi huá Cristo quincapuxculémán, quin, huanti litaxtuyahu xmacni, xlicana pi huá quincamapaksiyán, chü catziy xani naquincamascujuyán antani atzinú xlcasquinca lantla quililhuhucán huanti lilacstucahu xmacni. Chü lapi chatunu chatunu quin tancs makantaxtiyahu huantu xlá quincalimapaksiyán, amakapitzín acxtum nalitahuixcanikoy, chü nalitahuixkoy c-xtacanajlacán sampi xlicana kalhikoy tapáxquit.

**Lantla luhua xliłatamatcán
huanti lipahuankoy Cristo**

¹⁷Quit ccalistacyahuayán c-xtucuhuini quimpuchinacán yuma tachiñuñ, chü clacasquin pi camakantaxtítit: ccalihuaniyán pi nialh chuná calatapátit xtachuná lantla yama chixcuhuñ huanti ni lipahuankoy Dios; xlcacán caj xman chuná makantaxtimakó huantu nitú xlakasi huanikoy xacstucan xtalacapistacnicán. ¹⁸Lampala xalakacapaklhtutá kalhikoy xtalacapistacnicán. Xlcacán ni lipaxuhumakó yama sasti latámat huantu mastay Dios, sampi luhua nitú akataksa tu tlan talacapistacni, sampi luhua mapalhikonit xnacucán. ¹⁹Tamá nialh maxanankoy sampi catuhuá huantu lixcajnit talakalhín tlahumakó huantu nialh kalhiy xquilhtzúcut laquimpi luhua natamacamastanikoy huantu ni pala tzinú xlitlahuacán. ²⁰Huampi huixín huanti aya lipahanátit Cristo, nitú calixakatlicanítantit pi caj xman chunatiya lixcájnít nalilatapayátit. ²¹Cpuhuán pi aya lakapasátit huantu xtaluloktat Dios cumu pala cana akatáksit huantu calixakatlicántit tu masíyulh xtachihuñ Cristo.

²²Xlipacs yama xamakan milatamatcán huantu xliłapátit xalipulana, calakmakántit sampi lhuñu huantu lixcájnít xlitlahuapátit xalixcájnít mintalacapistacnicán huantu xcaakskahuimínitán. ²³Huá chü akatamá cacatzítit calakpalítit mintalacapistacnicán, xahuá mintayacán, ²⁴chü huá calilhakanántit yama xasasti latámat huantu Dios chuná camaxquiputunán, chü calimasíyútít lantla akstítum calatapátit. Huantu tlan tatlahu catlahuátit, chü xman huá calikalhchihuínántit, chü catlahuátit huantu xtalulóktat.

²⁵Huachá xpalacata ccalihuaniyán: nialh calaakskahuítit, huata huantu xtalulóktat catalalixakatlitit chatunu amakapitzín, sampi xlipacs quin xtachuná lantla chatumá litaxtuyahu sampi huá tapaksiniyahu Cristo.

²⁶Lapi xamaktum nasitziyátit huampi ni catlahuátit talakalhín, xahuachí ni tantacú calilátit mintasitizcán.

²⁷Sampi acxni ni lay patzankayátit, caj maxquiyátit quilhtamacú nacamakatlajayán akskahuíñ.

²⁸Pala tí lantla xapulana xkalhanán, pus chü nialh cakalhánal, huata catzúculh scuja laquimpi chuná namaklhtasiyutlhay huantu naliscuja, chü nakalhiy huantu nalimaktayakoy amakapitzín huanti pala nialh lay scujkoy.

²⁹Ni caj huatiyá pi caxcajuachihuínántit acxni kalhchihuínampátit, huampi calikalhchihuínántit huantu lacuan tachiñuñ, xahuá huantu xliłat laquimpi huanti nacakalhakaxmatkoyán namaktayalenkoy c-xtacanajlacán.

³⁰Ni calimakalipuhuántit caj xpalacata mintalalkalhincán yama Espíritu Santo tu Dios camaxquínitán laquimpi chuná nacalilakapascanátit pi caj xman huá Dios tapaksiniyátit, chü nacamaktayalenán hasta acxni

nalakchán yama quilhtamacú acxni
naquincamakatziñiyán quilaktaxtutcán
huantu quincamalacnüninítan.

³¹Xlipacs huantu nítlan talacapastacni,
catamacaxtútít c-milatamatcán, chuná
lantla tasítzín, lantla talaxcainín,
lantla takahu, lantla taquiclhcatza,
usu xcajuatachihuín, chu luhua
huantu nítlan latlahuaniyátit. ³²Chí
huampi acxtum tlan calacatzínitit;
pala tú nítlan xlatlahuaninítántit,
calamatzankananítit xtachuná lantla
Dios camatzankananín xpalacata
Cristo.

Acxtum quilalipaxquíticán xtachuná lantla Cristo quincapaxquínítan

5 Cumu xlicana Dios calacsacnítan
laquimpi luhua xlakskatán
nalitaxtuyátit, pus huá calhkamátit
xatlan xtalacapastacni xtachuná
lantla xlá kalhiy. ²Acxtum
calapaxquítit xtachuná lantla Cristo
quincapaxquínítan, chu hasta
tamacamástalh namaknicán laquimpi
chuná nalixokonán xpalacata
quintalahincán, chu Dios lakátilh
tu tláhuah lantla acxni luhua muclhún
tuncalay xtachuná limajinín, nima
limajinínancán c-xlatatín.

³Xlipacs huixín huanti tapaksiniyátit
Dios, ni pala tzinú caminiñiyán
natlahuayátit huantu lixcainit
talakalhín, xtachuná lantla
naxakatliya tanuj puscat pala
huí mimpuscat, usu pala lantla
tú kalhiputuna huantu kalhikoy
amakapitzín, chu ni milikálhit.

⁴Xahuachí ni calikalhchihuínántit
huantu ni lihuamputu, ni calahua
calikalhkamanántit huantu kalhiyátit
c-mimacnicán, sampi quin huanti
lipahuanahu Dios ni quincamininiyán
chuná nakalhchihuinanahu. ⁵Sampi
huixín luhua catziyátit pi huanti
xman huá puhuan lantla tlan
nakalhiy atanuj puscat masqui

huí xpuscatcán, usu lantla tlan
natlahuay lixcainit talakalhín, usu
huanti pacs maklakatilacán huantu
kalhiy ti lacatzú litahui, xlipacs
huanti chuná lamakó xlicana pi luhua
xtachuná pala xpuchiná tlahuanit tu
lakcatzalacán; huampi milicatzitcán
pi xlipacs huanti chuná lamakó,
niucxni lay catilakchankolh yama
laktáxtut huantu Cristo, chu Dios
namaxquikoy huanti lipahuanoy. ⁶Ni
pala chatum ti cacaliakskahuimín
lacuan tachihuín, pala nacahuaniyán
pi ni chuná catiquitáxtulh huantu
cchuanimán, sampi cacatzítit
pi xtasitzi lakastacyahuan Dios
fuerza nalakchankoy xlipacs huanti
caj xman kalhakaxmatmakamakó.

⁷Xlipacs huanti chuná lixcainit
lamakó, ni camaktanukótit, chu
ni lacxtum catalakótit. ⁸Sampi
huá uminchá quilhtamacú huixín
capaklhtutá xlapátit, huampi huá
chú aya lipahuanátit Cristo, chu
aya lilapátit cxkakánat; pus huantu
akstítum, chu tancs calatapátit
xtachuná lantla ti xlicana tapaksikoy
c-xkakánat. ⁹Chuná cchuanian
laquimpi nacatziyátit pi yuma
xkakánat huá mastay xaakstítum
latámat, talakalhamán, chu tapáxquit,
xahua talulóktat. ¹⁰Ankalhín
calaktzaksátit natlahuayátit huantu
lakatiy Quimpuchinacán. ¹¹Ni huá
camaktlahuátit lantla tu ni xliílat
xtachuná lantla tlahuakoy huanti
xalakacapaklhtutá lamakó, huata
xlipacs huantu nítlan tlahuakoy,
huixín calakuán camasiyútít. ¹²Xlicana
pi hasta luhua limaxaná pala caj
nalichihuinanahu huantu xlacán
tlahuakoy catzek; ¹³huampi acxni
huilikocán calakuán xlipacs huantu
tzek xuí, acxnicú chú luhua tasiyuy pi
nítlan, sampi huá xkakánat stalanca
masiyuy. ¹⁴Huachá xpalacata chuná
namá lihuán c-Likalhtahuaka:

“Calakastakuánanti huix huantí
lhtatápat;
pala aya xtachuná lampala nínita,
calakastakuánanti,
sámpí Cristo namaxquiyán
xkakánat tū akstítum
nalilatapayá.”

¹⁵Caná huixín, luhua cuíntaj
cacatlahuacántit lantla nalatapayátit,
luhua skálalh cahuántit, nī huá
xtachuná huantí nī accatzíy, huámpí
huá xtachuná tī catziy lantla
xliłatamatcán. ¹⁶Nī caj calactlahuapítit
minquilhtamacucán, huata ankalhín
caliscújtít Quimpuchinacán
sámpí xlicanā pī luhua tuhua yuma
quilhtamacú huantu pūlamahu. ¹⁷Pus
huá yumá xpalacata, nī xatuntusnū
calatapátit, chí huámpí caputzátit
lihuana naakataksátit xatú atzinú
lakatiy Dios natlahuayátit. ¹⁸Nī caj
caakkachitapátit sámpí chuná caj
lihuacá liaktzankatayayátit, huata
camasiyútít pī huixín kalhiyátit
Espíritu Santo c-milatamatcán.
¹⁹Chu acxni nakalhchiuínanátit,
calalitachiuiñántit pala aktum salmo,
usu aktum tatlín xla lipaxcatcatzínit tū
namapuhuaníyán Espíritu Santo, usu
takalhchiuín huantu nalimaxquiyátit
cacni Quimpuchinacán. ²⁰Xaliñankalhín
namaxquiyátit paxcatcatzínit
Quintlatican Dios caj xpalacata xlipacs
huantu tlahuama c-quilatamatcán
xlipacs quin huantí lipahuanahu
Quimpuchinacan Jesucristo.

Acxtum calapaxquikolh huantí tapuchuhuakonit

²¹Xlipacs huantí lipahuanátit
Cristo, acxtum calalakachixcuhuítit
huantu lahuaníyátit milītlahuacán
laquimpí chuná namakapaxuhuayátit
Cristo. ²²Huantí puchuhua
lacchaján, cakalhakaxpátit huantu
calimapaksiyán minchixcucán
xtachuná lantla kaxpatátit

huantu huan xtachihuín Cristo.
²³Sámpí huá chixcú mapaksiy,
chu puxculén xmahuíná xtachuná
lantla Cristo quincamapaksiyán,
chu quincapuxculemán xlipacs quin
huantí lipahuanahu, sámpí huá quin
xtachuná litaxtuyahu xmacni chatum
chixcú, chu huá Cristo quiakxekacán.
²⁴Chunámpí huá lantla quin huantí
lipahuanahu Cristo kaxmatahu
huantu quincalimapaksiyán, pus
nā chuná chú huixín puchuhua
lacchaján cakalhakaxpátit huantu
calimapaksiyán minchixcucán.

²⁵Chu huixín puchuhua chixcuhuín,
capaxquítit mimahuínacán
xtachuná lantla paxquikolh Cristo
xlipacs tī macxtum xcanajlanín, chu
hasta macamástalh xlatámat caj
xpalacatacán. ²⁶Xlá chuná tláhuah
laquimpí putum namasantujlikoy,
niñh tú nakalhikoy tū lixcájnít, caj
xpalacata xtachihuín tū xtachuná
chúchut huantu lichakamakancán
tū lixcájnít, ²⁷laquimpí lantla
xliputumcán, chuná huantu lilakátit,
chu nítú xtalakalhincán huantu
limaxcajuálíkonit namacamaxquikoy
Dios. ²⁸Xtachuná lantla chatum
chixcú lakcatzán, chu cuíntaj tlahuay
xmacni, pus nā chuná xliłakcátzat,
chu xlicuíntajtláhuat xmahuíná.
Sámpí huantí xlicanā lakcatzán
xpuscat, quitaxtuy pī xacstū man
lakcatzamaca. ²⁹Sámpí nī pala chatum
tī xcainimakán xmacni, huámpí
huata caj lakcatzán, cuíntaj tlahuay,
chu lihuana maktakalha, xtachuná
lantla Cristo quincalakcatzanán,
chu quincamaktakalhán quin huantí
lipahuanahu. ³⁰Sámpí lantla chatunu
quin litaxtuyahu xmacni Cristo.
³¹Huachá xpalacata chuná namá
litatzoktahuilanit c-Likalhtahuaka:
“Huá xpalacata, chatum kahuasa
limakaxtaká xtlat, chu xtzi laquimpí
natatalakxtumiy xpuscat, chu

masqui xchatuycán xuanit chatumá
lĭtaxtukoy.” ³²Xlĭcana pĭ tama tlanca
xtalacapastacni Dios huantũ quin
nĭ lay akataksahu, huampĭ huā quit
cuaniputún lantla xlatamat Cristo
chũ lantla xlatamatcán xlipacs huantĭ
lipahuankoy macxtum tahuankonit.
³³Pus huā yumá xpalacata,
lantla chatunu chatunu huantĭ
tapuchuhuakonitántit, calakcátzanti
mimpuscat xtachuná pala huá miacstu
lakcatzana, chũ maktakalhā mimacni,
chinchũ nā chuná huā puscāt,
camáxquilh cācni xchixcú.

**Lantla xĭlatamatcán camán,
xanatlatna, malaná, chũ tasacua**

6 Nā chuná huixín lakskatán,
lakkahuasán, chũ lactzumaján,
cakahakaxkpatkótit huantũ
calĭmapaksiyán mintlatcán,
xahua mintzicán, sampĭ chuná
lĭmakapaxuhuayátit Quimpuchinacán,
sampĭ xlĭcana chuná milĭtlahuatcán.
²Sampĭ yamā xakasiya xĭlmapaksĭn
Dios huantũ quincamaxquicanitán
laquimpĭ namakantaxtiyahu, chũ
laquimpĭ nakalhiyahu tlan latámat
chuná namá huan: “Capaxquikó
mintlat, xahua mintzí, ³laquimpĭ
makas, chũ lipaxuhu nalatapaya unũ
c-xokspun catiyatna.”

⁴Nā chuná huixín xanatlatna, nĭ caj
tiakslokokoyátit pala makasitziyátit
milakskatancán, chí huampĭ
huantũ tlan camakastackótit, chũ
camasiyunikótit lantla akstĭtum
nalipahuankoy Quimpuchinacán.

⁵Xlipacs huixín tĭ caj xatastán
c-tascújut camascujumán
chatum mimalanacán, lipaxuhu
cakahakaxpátit huantũ cahuaníyán,
chũ huantũ calĭmapaksiyán, xtachuná
calĭmaxtútĭ cumu lampala huá Cristo
lakachixcuhipátit. ⁶Nā nĭ caj xman
acxnĭ calakayán, chũ cauxcilhmán
mimalanacán cascújtĭ, chí huampĭ

masqui nitĭ, huixín chunatiyá tancs
caliscújtĭ, xlipacs minacucán
calĭtlahuátit, xtachuná luhua
scujnipátit Cristo, anán takpuhuantĭn
catlahuátit huantũ xtalacasquin Dios.
⁷Xlipacs huantũ calĭmapaksicanátit
natlahuayátit, chapaxuhua
catlahuátit, cacatzítit pĭ lampala
huā Cristo camascujumán, chũ nĭ caj
catĭhua chixcú. ⁸Sampĭ huixín aya
catziyátit pĭ lantla chatunu chatunu
quin chuná pala huantĭ xatastán
c-tascújut, usu huantĭ nĭ xatastán lama,
Quimpuchinacán namaxquiy xtaskahu
huantũ minĭniy lantla pala tlan, usu
nitlan huantũ titláhualh.

⁹Chinchũ huixín malananín huantĭ
mascujukoyátit huantĭ caj xatastán
miscujnicán, huantũ tlan cacatzinikótit,
nĭ caj calacaquilhnikótit. Sampĭ chuná
lantla huix, xahua xlacán kalhiyátit
chatum Mimpuchinacán huantĭ huilachá
c-akapún, chũ tama Quimpuchinacán
nĭ ananiy tastokopitzĭn huampĭ acxtum
capaxquiyán.

**Espíritu Santo lĭtamaktayayátit
c-milatamatcán**

¹⁰Natalanín, huá chũ ccahuaniyán
pĭ calĭtatlihuáklhtit tama xĭtlihuaka
huantũ camaxquiputunán
Quimpuchinacán. ¹¹Lĭhuana
calĭlhakanántit yamā xĭtlihuaka
huantũ camaxquiyán Dios
laquimpĭ nĭ natatlajiyátit acxnĭ
nacasokalíyán akskahuiní, chũ nĭ
nacaaskahuiimiyán. ¹²Sampĭ xlipacs
quin huantĭ lipahuana huā Cristo nitũ
talatlahuamakohu huantĭ unũ xalanín,
chũ nā kalhikoy xmacni, chũ xlúcut
lantla quin kalhiyahu, huampĭ huá
talatlahuamakohu tama lĭxajnit
xtalacapastacni akskahuiní huantĭ
masqui nĭ tasiyukoy huampĭ kalhikoy
tlanca lĭtlihuaka, xahua lĭmapaksĭn,
chũ malanankoy canĭhuá caunín,
xahua unũ catuxáhuat c-xlakstipancán

huantí capaklhtutá lamakó. ¹³Pus huá xpalacata ccalihuaniyán pī lihuana calitahuixcanítit tama lītlihuaka huantu camaxquiyán Dios laquimpī acxni natałatlahuayátit akskahuiní, nī natatlajiyátit, chu acxni aya tayaninítantit nahuán, chunatiyá akstítum nalipahuanátit Cristo.

¹⁴Huixín catziyátit pī tropa acxni latalatlahuakoy lītampachikocán la xlitampachicán, na chuná huixín calitatlihuáklhtit lantla lichicanátit xtalacapastacni Dios, na huá lantla akstítum lipinátit milatamatcán, xtachuná cahuá maclicán lipaxtoknu tu nalilhakananahu. ¹⁵Xtachuná lantla chatum sculujua tropa, huixín xaliñkahlín skálalh calatapátit, laquimpī luhua anán takpuhuanín natatxuyátit liakchihiunanátit yama tlan xtachihuín Jesús huantu mastay lipaxuhu latámat c-xlatatín Dios.

¹⁶Cumu tropa pacs kalhikoy escudos huantu nalilakapaxtokkoy licán, huixín na calimáxtútít xtachuná lantla miescudocán tama mintacanajlacán huantu kalhiniyátit Cristo laquimpī cumu tlihuaka kalhiyátit huá tlan nalipaxtokátit xlitlihuaka akskahuiní.

¹⁷Chu xtachuná lantla tropa taknu xla licán tu nalitamaktayay, na chuná huixín mintaknucán calimáxtútít yama akaputáxtut huantu Cristo camaxquiyán. Chu tama Espíritu Santo huantu aya camaxquicanítantit, xtachuná calimáxtútít lantla miespadacán huantu nalimacapahuanátit. ¹⁸Niucxni camaxtáktit pī natlahuayátit mioracioncán lantla camapuhuaníyán Espíritu Santo, nī nataxlajuaníyátit, ankalhín skálalh natahuilayátit lantla napalacasquinkoyátit lītlan pī

akstítum calatamakolh xlipacs huantí na lipahuanoy Dios. ¹⁹Na chuná quit naquimpalacasquinátit c-mioracioncán laquimpī Dios naquimaxquiy tlan talacapastacni, chu tlan nacmaakataksnínán tlan xtamacatzinín lantla xlá lakmáxtuputunkoy xlipacs tachixcuhuítat. ²⁰Dios quililacsacnít pī naclitaxtuy xpalacachihiuiná huantí naclichihiuinán yuma xasasti xtalacapastacni lantla maakaputaxtiputunkoy tachixcuhuítat, chu hasta caj huá xpalacata masqui quit cpatinamā c-pulachín. Huampi cahuanítit pī caquimáxquilh takpuhuanín nī naquilhpecuán naclichihiuinán huá lantla quilichihiuinat.

Pablo huanikoy hasta chalí natalanín

²¹Tama koxuta quintalacan Tíquico, huachá tī caleniyán yuma carta, xlicana pī luhua akstítum quincamaktayamán lantla cliscujmahu xtachihuín Quimpuchinacán, xlá lihuana nacalitachihiuinán lantla ctaxtuma, chu tu ctlahuama. ²²Huá xpalacata ccalilakmacamachán laquimpī nacalitachihiuinán pī tlan clamahu, chu chuná huixín na lihuacá naliakpuhuaníyátit.

²³Clacasquín pī yama Dios huantí xtlat Quimpuchinacan Jesucristo, xataxajni camaxquikolh xlipacs natalanín tapáxquít, chu tapaxuhuan laquimpī lihuacá nalapaxquikoy, chu tacanajla laquimpī akstítum nalipahuanoy, ²⁴chu pī casiculanatlahuakolh xlipacs huantí masiyukoy c-xlatamatcán pī xlicana paxcatcatzinikoy xtapáxquít Quimpuchinacan Jesucristo.